



SALA STAMPA DELLA SANTA SEDE **BOLLETTINO**

HOLY SEE PRESS OFFICE BUREAU DE PRESSE DU SAINT-SIÈGE PRESSEAMT DES HEILIGEN STUHL
OFICINA DE PRENSA DE LA SANTA SEDE SALA DE IMPRENSA DA SANTA SÉ
BIURO PRASOWE STOLICY APOSTOLSKIEJ دار الصحافة التابعة للكرسي الرسولي

N. 0234

Venerdì 27.04.2001

MESSAGGIO DEL SANTO PADRE ALL'ARCIVESCOVO DI ESZTERGOM-BUDAPEST NELLA RICORRENZA DEI MILLE ANNI DALLA FONDAZIONE DELL'ARCIDIOCESI

MESSAGGIO DEL SANTO PADRE ALL'ARCIVESCOVO DI ESZTERGOM-BUDAPEST NELLA RICORRENZA
DEI MILLE ANNI DALLA FONDAZIONE DELL'ARCIDIOCESI

Pubblichiamo di seguito il Messaggio che il Santo Padre ha inviato all'Arcivescovo di Esztergom-Budapest,
Em.mo Card. László Paskai, nella ricorrenza dei mille anni dalla fondazione dell'Arcidiocesi:

Venerabili Fratri Nostro

LADISLAO S.R.E. CARDINALI PASKAI

Primate Hungariae

Archiepiscopo et Metropolitae Strigoniensi-Budapestinensi

Gratissimas recordationes qui adhuc intra Nos custodimus binarum pastoralium Nostrarum salutationum apud Hungariae communitatem ecclesiam atque nationem, qui iucunda pariter memoria recentius tenemus iubilaeum millenarium evangelizationis ipsius "Pannoniae Sacrae", mentem hodie Nostram et paterni animi adfectum in unam intendimus Ecclesiam Strigoniensem-Budapestinensem quippe quae brevi tempore sit etiam suorum primordiorum anniversarium eventum commemoratura, millesimum scilicet a condita eadem ditione ecclesiastica annum.

Salutationem igitur hanc Nostram suo prope iure archidioecesis tua, Venerabilis Frater Noster, sibi meretur utpote quae alios inter proprios titulos eum etiam prae se ferat: "*Regni Ecclesiarum prima et magistra*", ut verbis clari Decessoris Nostri Nicolai Quinti utamur. Peculiari ideo benevolentia vos hoc tempore cogitamus, singulari cum consolatione vestram spectamus saecularem erga Cathedram Petri fidelitatem, unica quadam gratulatione hoc perseverantis fidei vestrae testimonium mille ipsos productum annos amplexamur.

Non vero minore mentis Nostrae studio vocisve vigore provocamus eandem vestram primatiam communitatem, quam alius item Noster Decessor Silvester Secundus "in metropolim suae subscriptionis

auctoritate" sanxit mille videlicet abhinc annos, ut inter tot nostri temporis minantes religioni illecebras, inter tam gravia traditae christianae pietatis pericula, facem revera attollat «Capitis Matris et Magistrae aliarum ecclesiarum Hungariae» praefulgeatque simul ceteris ibidem gregibus in exemplum illuminatae fidei ac renovatae christianae consuetudinis, solidorum catholicorum morum ac studiosae progressionis.

Hoc solo nimirum modo millenaria excitatae archidioecesis Strigoniensis celebritas, quam procul Nos intenta voluntate velut praesentes die huius Aprilis mensis undetricesimo sectabimur, certos fructus adferet in Hungarorum catholicorum vitam deinceps atque operam evangelicam.

Hanc denique salutationem tibi, Venerabilis Frater Noster, tuoque fideli clero ac populo inscriptam atque fervidam vestro de iubilaio millenario gratulationem comitari omnino volumus Apostolicam Nostram Benedictionem, qua ipsius Beatissimi Petri in suprema sede vobis caelitus adprecamur necessaria cuncta adiumenta praesidia lumina ad proximam pari laude ac prosperitate mille annorum aetatem percurrendam.

Ex Aedibus Vaticanis, die X mensis Aprilis, anno MMI, Pontificatus Nostri vicesimo tertio.

IOANNES PAULUS II

[00665-07.01] [Testo originale: Latino]
